

տանեց գիրով, Յովհաննէս Թիւթիւնճիի գործակցութեամբ և վկայութեամբ, Սաչատուր Գաղատացի կաթողիկոսը այս ու այն յանցանքներուն համար և յայտարարեց, թէ ան ժողովուրդին կողմէ մերժուած էր և անոր տեղ կաթողիկոս ընտրուած էր ինքը:

Ամբաստանութիւնը, շնորհիւ կաշառքի, ընդունուեցաւ. Դաւիթ արքունի հրովարտակով Սիս գնաց և իրեն համախոհներ ճարելով հոն՝ կաթողիկոս եղաւ:

Սաչատուր, իր կարգին ինքզինքը պաշտպանելու համար, գնաց Պոլիս և բողոքեց իր իշխանութիւնը յափշտակողին դէմ: Անիկա նեղը դրաւ Պոլսոյ հայ երեւելիները, ըսելով թէ իրմէ ինչ միաս տեսած էին որ դաւեցին իր դէմ: Անոնք չքմեղեցին իրենք զիրենք՝ յայտնելով, թէ պատրիարքն է պատասխանատուն: Երբ Սաչատուր կաթողիկոս կառավարութեան մեծերը կը սիրաշահէր Պոլսոյ մէջ, հակաթոռ Դաւիթն ալ հասաւ հոն, և երկուքին մէջ սկսաւ պայքարը:

Յովհաննէս պատրիարք Թիւթիւնճի, գլխաւոր պատասխանատուն այս պառակտումին, ստիպուեցաւ ժողով մը գումարել պատրիարքարանի մէջ, որուն ներկայ գտնուեցաւ նաև Էջմիածինի նոր նուիրակը՝ Գաղատիոյ առաջնորդ Մինաս արքեպս. ք. Եւ որովհետև Յովհաննէս Թիւթիւնճի և Թըլթըլեանք, կաշառուած՝ Դաւիթ կարկառեցիէն, հակառակ էին Սաչատուր կաթողիկոսին, վէճը երկարեցաւ: Սաչատուր ձանձրացաւ և տեղի տուաւ, պայմանով որ Դաւիթ Հալէպ նստի և այն թեմին մէջ միայն ամփոփուի իր իշխանութիւնը, բայց օգնէ Սիսի աթոռին կարիքներուն:

Այս համաձայնութեամբ՝ Դաւիթ դարձաւ Հա-